

重修廣平府志卷二十二

經政略

建置二

公署

公所附

府署在城內正北大堂前爲東西吏曹戒石亭前爲儀門門西有經歷坊大門兩翼有差役室左有保釐坊右有帥師坊中爲照壁壁前爲三輔襟喉坊左右有快壯皂三班房大堂後爲二堂堂東爲茶房西曰大有庫二堂後稍西爲宅門內爲三堂堂左有大花廳額曰復古軒廳左爲大書房廳前爲戲臺廳東南有火藥庫廳後有馬號西偏爲廚房三堂右有西花廳廳西別院爲幕寮室廳北爲帳房廳南別院爲花園園中有自怡亭蓮

花池又南爲菊圃三堂北爲內宅亦曰四堂西爲西四

堂宅後鎮樓今名浮青閣

房冊

元末燬於兵明初知府史

昭重建萬厯間知府蔣以忠崇禎間知府程世昌重修

國朝順治間知府許文秀張思明康熙間知府沈奕琛先

後增葺乾隆六年知府任業八年知府吳穀相繼修

舊志

嘉慶元年知府蕭和韻道光五年知府蕭光浩十八年

知府周岱齡十九年知府沈濤二十七年知府王桂同

治三年知府楊毓枬五年知府李朝儀八年知府長啟

光緒十一年知府佛爾恭額各有修葺十五年知府吳

中彥將署內外一律重修添建西花廳改建幕寮各室

創造園亭池圃並於照壁兩旁增建東西轅門十六年

重建署東南鐘鼓樓

房册 沈奕琛記略廣平隸在

蕪穢不治者有之予於乙卯五月來署越夏秋時雨浹旬衙舍之堂廡漏溼垣壁傾頽者強半不得已而加修葺迺度其緩急捐俸廩視工作不勞所屬之吏民以漸治之盈月而告厥成其規模仍舊戶牖增明改庖湔而為軒事者則西南隅之書屋三楹也闢草土而為公廨者則西北隅之圍房十五楹也內以親案牘旁以棲胥隸回視前此之糜朽其中空閒其外蕭然如環堵之狀或於安上全下之道庶幾咸宜矣因記之以告後之君子蕭光浩重修鎮樓記署後樓五楹不知建自何時樓脊標書大明崇禎戊寅仲春吉旦壁間有知府程公世昌因是年正月回祿重修小碑記考程公為郡名宦後官至巡撫碑尾督工官干總杜維棟杜郡志闕名距今已一百八十餘年屋宇率滲漏斜傾勢將圯余因捐廉略加修葺悉如舊式時道光五年乙酉十一月朔也長啟記略郡署後有鎮樓年久傾圯僅存小屋以祀仙人咸豐丙辰春余來權斯郡每朔望奉瓣香見其卑

隘思修葺之適去任未果同治己巳夏復守斯郡始因
水旱偏裨簿書鞅掌繼以文廟試院義倉諸鉅工次第
舉行未遑議及己卯冬友人倪振甫通守夜感夢兆倡
議重修余以修舉廢墜司土者之責也遂鳩工庀材經
始於己卯十月至庚辰三月而蕝事築臺爲基高八尺
上建樓三楹明窗四達遠望婁紫諸山排青疊翠如挂
几案間近則雉堞掩映萬瓦鱗次庶可以壯形勝而妥
仙靈名曰浮青閣並記其顛末如左 吳中彥記略
皇帝十有五年己丑余自易州改守廣平三月十二
日到郡見署前有三輔襟喉木坊其下土屋鱗次皆郡
民侵佔署地作小生理者局促喧囂車馬不能迴旋幾
不知中有府署在焉旣入署周視各處房舍年久失修
木朽牆傾四堂上房坍塌尤甚竟難棲止爰假民房暫
作辦公地出示令民間之侵佔官地者寬其旣往限以
時日遷移拆讓卽於接篆日先將四堂上房開工更造
四月二十六日工竣攜眷進署而署內外若刑錢房書
啟房會計房馬步皂三班房大廚房馬號房均殘破不
堪其餘大堂二堂大花廳家人辦公各房亦須擇要修
理工大費繁一時無力籌此鉅款迺稟請藩憲借廉修
署准領銀六百兩於是分其緩急陸續興修自頭門儀

門起築引路開地溝將舊刑錢房改作西花廳移建刑
錢房於西偏之北屋後添建朝南房三楹以作幕友之
內室又於西偏隙地斬荆棘除瓦礫圍以牆作小園鑿
池構亭雜蒔花藥竹木爲公餘憩息之所大堂以及二
三堂等次第整理殘者修之缺者補之以期苟完而已
外則三輔襟喉坊架以新木壘以新石丹青彩飾頓復
舊觀並於照壁兩旁添建東西轅門計自己丑三月經
始至辛卯十月歲事時閱三載修造房四十二間暨各
處修整工料共用白銀二千四百五十三兩有奇除署
前木坊係十屬觀瞻借資各州縣攤捐銀三百九十兩
其餘均捐廉爲之故於落成之日詳記其顛末如此
吳中彥重修鐘鼓樓記郡署東南隅舊有鐘鼓樓志書
謂以司啟閉之候者是也而形家以爲與文廟之奎星
樓文昌閣並係郡屬科名厯久失修郡人戚焉同治初
楊公毓枬爲郡守百廢具舉將重修之旣集貲矣尋以
書院工費不足移以補苴之不果修今
之十五年中彥承乏是邦郡署傾頽不可居捐廉興修
今歲得苟完而是樓久爲廢址咸以重修請爰順輿情
率屬捐廉重建如舊制經始於仲春三閱月而工竣落
成之日進郡人士而告之曰樓之建也僉謂有利於科

名爾多士亦知人以科名而重乎抑科名因人而重乎我郡人才之盛自漢魏以來多有見於史冊洪惟我國家深仁厚澤養士之優軼於前代爾多士讀聖賢書果能深曉乎明體達用之學以博求夫致君澤民之術異日人文蔚起處爲真儒出爲名臣豈不爲科名增重而爲邦家光乎若但以無本之學求速化之方幸而撥高第登巍科不過志在溫飽以誇耀於鄉里之間而已則非余今日所以重建是樓之志也衆皆曰善爰敘所言以爲記郡之人士苟不以余之不德而廢其言也卽以斯言爲暮鼓晨鐘焉可乎是役也計費銀八百肆拾兩錢肆百拾捌千玖佰五十文凡捐廉者具勒碑陰董其事者郡紳五品封職范懋鴻臚寺序班武用咸也

案舊志大堂兩翼有贊政廳左架閣庫儀門外東有

寅賓館西有囿囿所今皆久廢又採訪冊浮青閣後有大土冢相傳爲地皇廟云

河務同知署在府城西四十五里臨洛關道光二十二

年本舊通判署改建同治九年同知林世俊捐廉購地

於舊址之南創建新署即今地

房冊

經歷解在府治西

舊志

僅存基址光緒十八年知府吳中

彥督同經歷臧良圻重修

房冊

臧良圻記府治之西有廳署焉附轅密邇便趨公

也自咸豐間失於時修上雨旁風日益侵蝕迄今三十餘年垣圯棟折滿地蓬蒿衣冠之場為瓦礫矣光緒乙酉余以史館議敘選授斯職既莅任無可棲止稅民舍居焉湫隘偪仄無復規制而夙暮趨公尤多不便每思修葺舊署苦於款鉅難籌輒復中止已丑春府憲曉滄吳公來守是邦新猷彪煥百廢具興晉謁之餘恒以廳署廢荒為念且曰即事有序終必為若成之閱三年壬辰孟春乃為請諸藩憲以是缺十年廉金四百兩備用捐修而核計所需仍未及半公慨然率屬捐助於是鳩工庀材延郡紳董其事不假胥吏丁役之手自春徂夏六閱月而告成計修廳事三楹為辦公之所照壁大門儀門各如式班房內宅悉備共為宇二十一間周圍牆

垣一律完固既歲事客從而落之有爲之言者曰平地爲山夫人而難之今吳公以大公之念不以難阻不以久懈不以人已分不以施與吝是署也廢而復興功成一且利賴百年其德厚矣念哉謹對曰唯唯不敢忘課工督率紳董之力也若蘇君懷福武君用章范君懋苗君在田武君用咸諸君子總理精詳始終共事吳公之議諸君子實克成之念哉謹對曰唯唯不敢忘則又有肅然而起揚解而言者曰國家設是署也以爲公也吳公盡其心諸君助其廉用其勞亦以爲公也君惟竭誠奉公善於職斯無負矣苟以爲私惠於己日相親比則又非也念哉余作而拜酬之酒而應之曰唯唯謹受教雖然余亦有鄙見焉夫勤於趨事公也事有餘暇職思其居補葺以時勿使頽壞以貽來者私而亦公也今以茲署廢荒重廬上官慮勞心費財用成斯舉又重煩諸君子累月跨時於心何安而今而後率蘿附塗余知勉矣更願後之莅斯任者急於趨公而亦急於私之公則尤幸甚僉曰善哉爰次其語爲之記既誌不忘並告後之同志者

試院在府治東南明萬厯間知府喬因羽以察院舊址

改建舊志同治十年知府長啟郡人武汝清李待時重修

兩文場十二年郡人高甲等重修大堂魁樓一律完整

採訪冊明杜縻記略洛州爲畿輔南郡地僻訟簡舟車罕至督學使者恒駐節焉小試則一歲至大比則三歲一至至則調兩府士來就試而一切構棚之費第吾郡當之兩府無與焉棚藉席麻輒壞輒構勞費無已時蓋吾邑之困是役舊也關中喬公因羽由夏官郎來莅郡甫下車卽捐金庀材責其成於永年令王公梅南北長二十武東西闊十四武高三丈許梁七十架上覆以瓦下實以磚石週樹以牆牆以尺計者三由牆暨簷水閣以層計者三宏敞峻固諸學人操觚來者惟是風雨燥溼可無虞其功不甚宏遠哉國朝長啟記畧郡城東南隅有試院一區創自萬厯年間督學使者恒於是駐節焉每歲科兩試合十邑之士就試於斯顧歲月既久日漸頽敗雖十邑例有歲修之舉奈率循故常罔有實濟余昔年會權此郡有志修葺因去任未果嗣於同治己巳年復來守土越二年時和歲稔爰於前永年令錢君今永年令王君商摧興修措費庀材土木大作

延公正紳耆董其事自庚午之冬辛未之夏迄癸酉之秋兩番營造始克有成共建大門三間吹鼓樓二座儀門三間奎星樓一座東西文場共二十二間大堂五間監試內巡房各二間過廳四間上房五間門房二間看卷房十二間東羣房二十八間西羣房十二間東外官廳七間西巡捕廳南北各三間共計大小房屋一百十七間周以繚垣宏敞鞏固計前後廩京錢壹萬柒千三百餘緡惟是十邑人士來試於斯者風雨燥溼可以無虞守土者之心庶幾乎稍慰矣

閤郡公館在府署大門西院落三處中爲關帝廟左右皆有北屋三楹南屋三楹左有東屋二楹右有西屋三楹馬棚在左院後舊多圯廢光緒二十年知府吳中彥

倡率各屬捐修

房册 吳中彥記畧本署西南舊有公寓一所爲各屬晉府稅駕之地其肇造

無碑記可考閱武廟匾額楹聯皆乾隆癸巳前守沈鳴皋題或者創建於斯時未可知也迄今百數十年棟宇

推圮不堪棲止同治中雖補葺廟廊而東院屋皆殘破
西偏已鞠爲茂草矣光緒己丑春三月余蒞任後各屬
來商公事者往往僦居客店人雜地狹心竊慨焉乃捐
廉金百兩爲倡各屬分輸鶴俸繼之自甲午三月鳩工
逾月而告成共建廳舍十八楹車馬棚九楹爐竈床几
一切悉備而廟宇山門並煥然一新工畢虧京帑三百
緡無款可籌余復續捐京帑百緡司馬張見吾又捐二
百緡以足之而工乃獲就余豈好勞哉亦聊盡東道之
誼云爾

牛痘局在南大街義倉光緒十年知府長啟勸捐設立

採訪冊長啟記略引種牛痘一法幼幼之良方也有
心利濟者輒設局施種通都大邑無地無之俾孩提之
童得免苦劫而全生命其裨世豈淺鮮哉廣郡李君亦
畚素諳岐黃於郡城施種牛痘有年活人無算因限於
經費屢作屢輟余心憫焉爰與舒驥堂言應干兩大令
羅仲卿少尉商辦勸募以資局用適春晴帆大令權邯
鄲篆捐集鉅款暨永年紳董共捐京錢三千餘緡發商
生息延請名醫分期施種自光緒八年正月開局已點

種數千百人童蒙得以遂生善事得以垂遠非諸君子
保赤誠求而能如是乎爰誌顛末以告後之官斯土者
時光緒十年五月也牛痘局章程一種痘以八日爲
期不可擁擠今定每期以五十號爲度令種痘者先赴
局登號領籤滿號者歸入下期再種一傳漿日期預先
牌示風雨不阻一凡來種痘須驗明幼孩面色無病者
方爲妥種一還漿清稀及毒盛者概不傳點一種痘以
傳漿爲要無論何人均須還漿倘有種後而不來局還
漿者查出議罰一漿期男女須分兩屋以免混雜一漿
期夏日須多備茶水冬日預備火盆每期買木炭三觔
點種時燒起俾小兒嚴冬不致受凍一酷熱嚴冬之時
種者甚少往往斷漿須先期僱覓小兒每期多則五人
少則三人每人給京錢四百文由值年紳董給發一種
痘先生現正副手二人點種每年束修共二百串正手
一百二十串副手八十串按季支給一年一送關書凡
登號給籤皆歸二人經管每次報明種痘人數一紙送
府以備查考仍於年終彙報總數一種痘先生倘或斷
漿及不認真點種者一面扣除束修由值年紳董公同
舉人稟請本府定奪另延毋得瞻徇如有事故須更換
者亦由紳董公舉稟辦一局中收取生息支發用項帳

目稽查種痘人數多寡責成四街紳董每年二人輪流值年一年一換將帳目按月懸榜局門年終開四柱總簿彙報本府查核至每次種期值年紳董務必到局照料局預備飯食一頓每次準支公項京錢一千文以期久遠一局夫一名係與義倉夥用每月由局給工食京錢二千文令其常川住局伺候茶水並支應一切不許向種痘家索取錢文如違驅逐一本局經費共籌措成本京錢三千串責成永年縣文昇當成安縣義生當兩鋪分領每鋪京錢一千五百串每月按一分行息立有憑摺按季支取官督紳辦以期永久所有成本發商生息州縣無論何項要公不得向當商提用如當商有私自付與致款無著落者由該當商照數賠出並倍罰以裕經費一凡外縣除來局就種外其有必須前往點種不誤本局種期者所有車馬盤費一切均由請家自備一本局官為施種不收種痘家分文如有撞騙需索等事準種痘家在局喊究

陰陽學醫學在府治前

舊志

永年縣

縣署在府治東南大堂兩翼左庫樓右幕廳

案縣志
廳已廢

堂

前東西吏曹戒石亭前爲儀門門西爲囹圄所東南爲班房前爲大門再前照壁大堂後爲二堂堂東爲庫吏室堂北爲宅門內爲三堂又北爲內宅西爲書房東爲花廳再東爲東書房東南隅爲馬號北爲幕室

房
冊

明洪

武三年知縣陸禮建
成化十二年知縣耿琚嘉靖三年知縣孫允中五年知縣宋瑛相繼修

國朝同治十年知縣錢敏重修

縣志

光緒十九年知縣楊誠

一重修花廳三堂

縣冊

案縣志三堂東有補過齋有箭道儀門東西有角門

各一座外東偏有賓賓館大門外有申明旌善懲惡等亭今俱廢

典史廨在縣治迤西

縣志通志作迤東誤

大堂三楹二堂三楹

西客廳三楹二堂東為書房北為內宅

房冊

行館二所一在臨沼鎮北門內道光初知縣沈惇厚購

置一在臨沼驛後光緒三年知縣夏詒鈺重修

縣志

保甲局在南街義倉

採訪冊

養濟院在城東北隅乾隆五年知縣丁應蕙建同治十

一年知縣錢敏重修

縣志

額養孤貧一百九十九名

輔通

志余維樞養濟田記制天下州邑置院畜老幼之孤處而貧者養濟之名義相承越數百年罔或易此無異

故政要諸德者可大法原諸古者可久也上世老有所終幼有所長鰥寡孤獨廢疾皆有所養貨力不必爲己而男女有歸其後養幼少存諸孤令於春養衰老授几杖行糜粥飲食令於秋而周官遺人職委積則又有門關之入以養老孤噫何其厚歟國家因明之故孤貧花布口糧載在賦役有常數永邑正糧八十名食三斗者五十九名候缺者六十名錯計歲給幾四百金每臺使者按部籍其名憲綱冊以待稽核而加賑貸焉邇者軍役數興司農殫計無術請裁省一切供費十三年

世祖章皇帝軫念顛連特命給贖穀專以收養責

有司十八年

今上繼位惡頑慝寬民貲則諭去贖

決杖蓋天下自此治平矣軍旅且休省者增裁者復若等不過少族旦夕何憂雖然朝廷建治立官簡畀嘉師豈惟刑管政斂奉令因循哉抑冀隨宜措施佐先後意之所不逮也易稱窮則變變則通通則久以余謬長茲土弗獲變通俾脫凍餒曷以廣王心子元元乎念先是既捐薪俸補穀不足更爲曲折授餐復自咎澤垂至而待之興謀事不底於久成終苟道耳乃努力稍輸百金契地四十畝爲養濟田使得薄資其產所出並使繼起同心者藉其基以可續而樞於是益識爲治有體也大

臣持籌於上則重國計有司承宣於下則重民生斯田之設良屬難已豈市恩歟昔武侯論政以大德不以小惠夫文王治岐也施仁焚獨不侮鰥寡後賢舉明堂布政者必先及斯焉養濟有田庶無告者不至失所卽未幾歲給仍舊而斯田賴式廓之以普潤窮黎則區區四十畝之田亦猶行古之道焉爾雖曰小惠其安敢辭

留養局在臨洛關乾隆間知縣孔廣棣建同治十年知

縣宋陳壽補葺

縣志 孔廣棣記略廣棣承乏永邑適制府宮保方飭屬建設留養局以賑卹

四方往來貧病無依者是卽仰體

皇仁推廣德意

師古振窮之遺意而行之也念縣屬臨洛鎮適當衝要爲七省之通衢遠涉他鄉際嚴冬酷暑貧病不能行目擊爲之惻然因度地經營創置局舍凡三十有六間視城局爲稍廣越三月而次第告竣局旣成計終歲養贍之需與一切款項之用謀所以垂久遠者又恐司事不得其人民鮮實惠復慎選老成殷實耆老分任經理而余又時加察訪稽多寡定條規以整齊而約束之庶不致法久弊生有振窮之名而無其實也余建斯局亦祇仰體

皇仁推廣德意上酬

聖天子視民如傷